

ნიკოლოზ ბულაბერიძის სასულიერო და სახელმწიფო მოღვაწეობიდან

XII საუკუნის II ნახევრის საეკლესიო და სახელმწიფო მოღვაწის, კათოლიკოს-პატრიარქ ნიკოლოზ გულაბერიძის შესახებ საისტორიო წყაროებში ცნობები ძალზე მწირადაა შემონახული. მართალია, სამეცნიერო ლიტერატურაში არაერთხელ დასმულა საკითხი ნიკოლოზ გულაბერიძის ცხოვრებისა და მოღვაწეობის შესახებ, პრობლემა კვლავ მოითხოვს გულდასმით შესწავლას, რათა დაზუსტდეს მისი ცხოვრებისა და მოღვაწეობის პერიოდი, განისაზღვროს მისი ადგილი საქართველოს სახელმწიფოს, ქართული ეკლესიის ისტორიაში, გამოიკვეთოს მისი წვლილი ქართული მწერლობის ისტორიაში. ქართული საისტორიო წყაროების ნაწილი თარიღებით რომ არ გვანებიერებს, ეს ამ შემთხვევაშიც, ნიკოლოზ გულაბერიძის ცხოვრებისა და მოღვაწეობის კვლევის დროსაც, გამოჩნდა.

საკუთარ ბიოგრაფიულ ცნობებს ნიკოლოზ გულაბერიძემ თავად გვამცნო თავისსავე თხზულებაში – „**საკითხავი სვეტისა ცხოველისაჲ, კუართისა საუფლოდსა და კათოლიკე ეკლესიისაჲ**“, რომელშიც სვეტიცხოველის ერთ-ერთი სასწაულის აღწერისას შეიტანა ეპიზოდი თავისი ბიოგრაფიიდან; მას ავტობიოგრაფიის გადმოცემის მიზანდასახულობა არ ჰქონია; ეპიზოდის მიზანი იმ სასწაულის ასახვა იყო, თუ როგორ გადარჩნენ ნიკოლოზი და მისი მხლებელი მდინარის ადიდებისას ცხოველი სვეტის სასწაულებრივი წინამძღოლობით. მწერალი მიუთითებს, რომ მისი ბიძა, მამის ძმა სვიმონი, პატრიარქობამდე არმაზში წმ. საბას მონასტერში მოღვაწეობდა. ახალგაზრდა ნიკოლოზი სწორედ თავის ბიძასთან მიდიოდა კახეთიდან არმაზში: „უამსა მას სიყრმისა ჩემისასა, რაჟამს-იგი ნეტარი მამისძმაჲ ჩემი სვმონ, პირველ პატრიარქობასა მისისა, მონასტერსა შინა იყო წმიდისა საბასსა არმაზს, მაშინ უკუე მე კახეთით მოვიდოდე მის წინაშე“... (გულაბერიძე, 2007:53). სასწაულში მოგვეხრობს იმის შესახებ, თუ როგორ გაიყვანა არმაზს

მიმავალი სრულიად ახალგაზრდა, სიერმის ასაკში მეოფი ნიკოლოზ გულაბერისძე ზეცად აღწეულმა ცხოველმა სვეტმა სოფელ წიწამურთან („სოფელსა მას მახლობელსა არაგვსასა წიწამურს“ – გულაბერისძე, 2007:53) აღიღებული არაგვის ერთი ნაპირიდან მეორეზე თავის თანმხლებ პირთან ერთად, რომელიც ღვინით დატვირთულ ცხენს მიუძღოდა. ეს ეპიზოდი სვიმონისა და ნიკოლოზის ცხოვრებამოღვაწეობის წლების განსაზღვრაში გვეხმარება, რისთვისაც ამოსავალია ფრაზა „პირველ პატრიარქობასა მისისა“, რომელიც გულისხმობს, რომ ეს ამბავი სვიმონის პატრიარქობამდე მომხდარა. აქ „პირველ“ „ადრე“-ს ნიშნავს. ეპიზოდის მიხედვით, ნიკოლოზი, ჯერ კიდევ ერმა, ე. ი. 16-18 წლისა, გაგზავნეს მცხეთაში, არმაზში, ბიძასთან. სვიმონი 1125 წლისთვის ჩანს კათოლიკოს-პატრიარქად, ე. ი. ეს ამბავი 1125 წლამდეა მომხდარი. აქედან გამომდინარე, ნიკოლოზი უნდა დაბადებულიყო 1107-1109 წლებში. თამარის მეორედ გამეფებისას იგი დაახლოებით 75-76 წლისა იქნებოდა; როგორც კ. კეკელიძე უთითებს, იგი გარდაცვლილი ჩანს 1190 წლისთვის, როდესაც არაუმეტეს 85 წლისა იქნებოდა, რაც სავსებით ბუნებრივი და დასაშვებია.

ამრიგად, სვიმონი საქართველოს კათოლიკოს-პატრიარქი გამხდარა ნიკოლოზის სიერმის წლებში, რადგან ათონის ქართველთა მონასტრის აღაპებში იგი 1125 წლისთვის უკვე კათოლიკოსად მოიხსენიება. ეპიზოდი მოწმობს, რომ, ერთი მხრივ, ნიკოლოზის მიმართ ბიძამისი სვიმონი განსაკუთრებულ მზრუნველობას იხენდა, მეორე მხრივ, ოჯახიც ყურადღებით ექცეოდა სვიმონს, ხოლო ბიძა-ძმისწულს თბილი, სულიერი ურთიერთობები ჰქონიათ. უნდა აღინიშნოს, რომ თხზულებაში ეს ეპიზოდი, როგორც სხვა რამდენიმე ეპიზოდი, სრულიად დამოუკიდებელი თხზულების შთაბეჭდილებას ტოვებს.

სვიმონის შესახებ ცნობა დაცულია დავით აღმაშენებლის „ცხოვრებაში“, სადაც დავითის მიერ 1124 წელს შარვანის აღებასთან დაკავშირებით იგი მოიხსენიება: შარვანში „დაუტევნა ციხეთა და ქალაქთა შინა ღაშქარნი დიდნი, ჰერნი და კახნი. განმგებელად და ზედამხედველად ყოველთა საქმეთა მანდაურთა აჩინა მწიგნობართუხუცესი თვისი სვმონ, ჭყონდიდელი მთავარეპისკოპოსი, მაშინ ბედიელ-

აღავერდელი, მიმსგავსებული გიორგი დედის ძმისა თვისისა, კაცი ყოვლითურთ სრული და ბრძენი“ (ქართლის ცხოვრება, 1955:345; დავითის ცხოვრება, 1992:197); სვიმონი იმ დროს ბედიელ-აღავერდელი ყოფილა, დავით აღმაშენებელმა მას მწიგნობართუხუცესობა გიორგის, თავისი ბიძის – დედის ძმის, გარდაცვალების შემდეგ მისცა, ხოლო ჭყონდიდელი მთავარეპისკოპოსი 1125 წელს გახდა. საგულისხმოა, რომ სვიმონი დავით აღმაშენებლის ანდერძშიცაა მოხსენიებული, როგორც ბედიელ-აღავერდელი. დავითოვანებ ტექსტს: „აწ სვამონ ბედიელ-აღავერდელისა იყოს შევედრებულ – რააცა საქმე და საურავი მათი იყოს, იგი ივეოფოდის, რომელსა ჩუენ ვერ მივიწინეთ. და შემდგომად მისსა, თუ მისსა ადგილსა ამითვე წესითა, სხუაჲ მწიგნობართუხუცესი იყოს, იგი იურვოდის. და თვთ ძუჭლთა და აწინდელთა ქართლისა კათალიკოზთა ჭელნი ვითარად ჰქონან, არცა ქართლისა კათალიკოზისა საქმე არს მღვმესა ზედა, არცა ვის სხვსა ეპისკოპოსისა, არცა ზვერი, არცა მეფეთა, არცა მუხრანისა გამგეთა; არცა მღვმისა შემდგომად ვის აქუს ჰელმწიფებაჲ, არცა მათთა აგარაკთა და საქონებელთაჲ თანა ვის საქმე უც“ (სილოგავა, 2010:114-116).

დავით აღმაშენებლის ანდერძი შიომღვიმისადმი დათარიღებულია 1124 წლის სექტემბრით, რაც მნიშვნელოვანია სვიმონის მწიგნობართუხუცესობის თარიღის განსაზღვრისათვის. ანდერძში განსაკუთრებული მნიშვნელობა უნდა მივაჩიოთ ფრაზას: „და შემდგომად მისსა, თუ მისსა ადგილსა ამითვე წესითა, სხუაჲ მწიგნობართუხუცესი იყოს, იგი იურვოდის“, სადაც ჩანს, რომ, ერთი მხრივ, აქ წამოწეულია მწიგნობართუხუცესისა და შიომღვიმის მონასტრის წინამძღვრის ურთიერთდამოკიდებულების შესახებ, მეორე მხრივ, ისიც ჩანს, რომ ანდერძის შედგენის დროისათვის სვიმონი უკვე იყო მწიგნობართუხუცესი. იმ დროს თუ სვიმონი მწიგნობართუხუცესი არ იქნებოდა, რატომ მიმართავდა მეფე დავით აღმაშენებელი ბედიელ-აღავერდელ სვიმონს, ჰქონდა ამ თანამდებობის მქონე სასულიერო პირს იმის უფლება, რასაც სვიმონს ავალებს მეფე? აქ ნათქვამი – „სხვაჲ მწიგნობართუხუცესი იყოსო“, სვიმონის შემდგომდროინდელი, სხვა მწიგნობართუხუცესის შესახებ საუბარს მოწმობს; ამ წინადადებით მეფემ პირდაპირ მიუთითა იმ ხა-

ნებში სვიმონის მწიგნობართუხუცესობა. აქედან გამომდინარე, სვიმონი მწიგნობართუხუცესი იყო დავითის სიცოცხლეში, ანდერძის შედგენის დროისათვის, 1124 წლის სექტემბრისთვის, თუ ანდერძის შედგენის თარიღის ვ. სილოგავასეულ თვალსაზრისს გავიზიარებთ.

ნიკო ბერძენიშვილისა და მარიამ ლორთქიფანიძის დაკვირვებით, „ნიშანდობლივია თვით ამ სვიმონის ბედიელ-აღავერდელობაც, რადგან ერთი პირის ხელშია გაერთიანებული დასავლეთ და აღმოსავლეთ საქართველოს შორეული (ბედია, აღავერდი) კათედრები, რაც დავითის გამაერთიანებელი პოლიტიკის ერთ-ერთი აშკარა გამოვლინებაა“ (ლორთქიფანიძე, 1979:218-219; იხ. აგრეთვე: ბერძენიშვილი, 1974:29, 90). სვიმონი კათოლიკოს-პატრიარქი გახდა 1125 წელს, რადგან ამ დროიდან მოიხსენიება იგი ამ თანამდებობაზე. მისი კათოლიკოს-პატრიარქობა XII საუკუნის II მეოთხედითაა დათარიღებული, ზუსტი წლები არაა დადგენილი. სვიმონის შემდეგ, დემეტრე მეფის დროსვე, 40-50-იანი წლების მიჯნაზე, საქართველოს კათოლიკოს-პატრიარქი გამხდარა საბა II, რომლის შემდეგ ჩანს საკათალიკოსო ტახტზე ნიკოლოზ გულაბერისძე, სვიმონის ძმისწული. სვიმონი გიორგი ჭყონდიდელ-მწიგნობართუხუცესის დისწული იყო, ხოლო ნიკოლოზ გულაბერისძე სვიმონის ძმისწული. ნათლად ჩანს, რომ ისინი სამეფო ოჯახის ახლო წრის წარმომადგენლები იყვნენ. ასე გადაიკვეთა სამი უდიდესი სასულიერო პირისა და სახელმწიფო მოღვაწის ცხოვრებისა და მოღვაწეობის გზები.

როდის უნდა ემოღვაწა ნიკოლოზ გულაბერისძეს?

თუღო უორდანიამ თავის შედგენილ „ქრონიკებში“ თავისი მოსაზრება გამოთქვა ნიკოლოზის მოღვაწეობისა და საქმიანობის შესახებ „ქართლის ცხოვრებისა“ და ათონის მონასტრის ისტორიულ-დოკუმენტური წყაროების საფუძველზე. მისი შეხედულებით, ათონის ქართველთა მონასტრის სააღაპე წიგნი მეტად საინტერესო წყაროა ნიკოლოზ გულაბერისძის კათოლიკოსობისა და მისი ცხოვრების წლების განსაზღვრისათვის. მან ყურადღება მიაქცია ალაპთა წიგნში მოხსენიებულ ფაქტს პავლეს წინამძღვრობასთან დაკავშირებით, რომლის მიხედვით 1170 წელს „პავლე წინამძღვრად დამჯდარა, ხოლო თამარის მეფობაში მეორე

ინდიქტიონი მოდიოდა 1184 და 1199 წ., ამნაირად პავლეს წინამძღვრობა 1179-1199 წ., ანუ 1170-1184. მაშასადამე კ-ში ნიკოლოზი იერუსალიმს წასულა 1170-1181 წლებში, (ქ-ცხ., 280); სვიმონ ჭყონდიდელისაგან (იგი ჩანს 1125 წლის ახლო ხანში, ქ-ცხ. I, 252) აღზრდილი ნიკოლოზი დიად მოხუცი იქნებოდა 1184 წელს და დიდხანს ვერ იცხოვრებდა“ (ქრონიკები, 1892:271). ძმების ვასილ და პოლიევქტოს კარბელაშვილების მოსაზრებით, ნიკოლოზი კათოლიკოსად უნდა ყოფილიყო 1149-1160 წლებში. თუმცა, ამ მოსაზრების ავტორებს შესაბამისი დამადასტურებელი წყაროები არ დაუსახელებიათ (გულაბერისძე, 1908: 8; კარბელაშვილი, 2011:59-61).

ივანე ჯავახიშვილმა „ძველი ქართული საისტორიო მწერლობის“ 1921 წლის გამოცემის მეორე ნაწილისათვის დაწერა გამოკვლევა „ნიკოლოზ კათალიკოსი“, რომელიც 1956 წელს გამოქვეყნდა მისსავე კრებულში „ძველი ქართული ენისა და მწერლობის საკითხები“. მასში განიხილა ნიკოლოზ გულაბერისძის ცხოვრებასა და მოღვაწეობასთან დაკავშირებული საკითხები, კერძოდ, „საკითხავის“ ტექსტის მიხედვით წარმოაჩინა ნიკოლოზის ბიოგრაფიის ზოგიერთი მომენტი და დასვა კითხვა, არის თუ არა ეს ნიკოლოზი თამარის თანამედროვე ათონზე ნამყოფი მოღვაწე ნიკოლოზ გულაბერისძე, რაც ათონის მონასტრის სკრიპტორიუმში დაცული საბუთების მიხედვით შეიძლება გაირკვეს და რაც მან შემდგომი კვლევის საგნად დასახა (ჯავახიშვილი, 1977:396-397). აგრეთვე, მან განსაზღვრა თხზულების დაწერის მიზანდასახულობა, საკითხი საქართველოში ქალის მისიის შესახებ, ამ საფუძველზე ყურადღება გაამახვილა წმ. ნინოს ცხოვრებისა და მისი მისიონერული მოღვაწეობის პრობლემატიკაზე, საგანგებოდ წინ წამოსწია სვეტი ცხოველისა და სვეტიცხოვლის ტაძრის მნიშვნელობა; განსაკუთრებული მსჯელობის საგნად აქცია ისტორიის ფილოსოფიის არსის გარკვევა, ე. ი. კვლევა წარმართა ფაქტებისა და მოვლენების არა მხოლოდ აღმწერლობითი//მომთხრობელობითი, არამედ ძიებით-ფილოსოფიური თვალსაზრისით. ი. ჯავახიშვილის მიერ კათოლიკოსის ბიოგრაფიის განხილვა ემყარება თვით ნიკოლოზ გულაბერისძისავე თხზულებას, რომლის მიხედვით ნიკოლოზ გულაბერისძე გიორგი მესამისა და ბურდუხან დედოფლის თანამედროვე კათალიკოსია,

თუმცა, ნაშრომში მკვლევარი კონკრეტულ თარიღებს არ ასახელებს (ჯავახიშვილი, 1977:396-409).

კ. კეკელიძის შეხედულებით, ნიკოლოზი საქართველოს კათოლიკოსი ყოფილა 1150-1178 წლებში (კეკელიძე, 1960:318). საამისო წყაროები, ვასილ და პოლიეექტოს კარბელაშვილების მსგავსად, არც მას დაუსახელებია, თუმცა, მიუხედავად ამისა, მისი შეხედულება უფრო რეალური და მისაღები ჩანს, რადგან, თავად ნიკოლოზისავე მონათხრობით, იგი კათოლიკოს-პატრიარქი ყოფილა გიორგი მესამისა და ბურდუხან დედოფლის ზეობის ჟამს. ამას ადასტურებს მის თხზულებაში დაცული ცნობა, რომლის თანახმად, ნიკოლოზ გულაბერისძე საკუთარ თავს ბურდუხან დედოფლის თანამედროვე კათოლიკოსად მოიხსენიებს. ამასთან დაკავშირებით იგი იხსენებს ეპისკოპოსთა კურთხევის წესს და მოგვითხრობს ამ წესის დარღვევის ერთ შემთხვევას კათოლიკოსად მოღვაწეობის პერიოდიდან. ამ ფაქტს განსაკუთრებული მნიშვნელობა ენიჭება, ერთი მხრივ, თვით ნიკოლოზის მოღვაწეობის დასათარიღებლად და მისი პიროვნების შესაფასებლად, მეორე მხრივ, გვაცნობს ეპისკოპოსთა კურთხევის წესის აღსრულების პირობებს.

ქართველ მღვდელთმთავართა მიერ დადგენილი საეკლესიო კანონით, საქართველოში ეპისკოპოსთა კურთხევის ადგილად **სვეტიცხოვლის ტაძარი, უფლის კვართის სამკვიდრებელი**, იყო დადგენილი⁷. ნიკოლოზ გულაბერისძე გვიამ-

⁷ „ეპისკოპოსის კურთხევის წესში“ წერია: „თვნიერ მცხეთისა დიდისა სამოციქულოთა ეკლესიისა ყოვლითურთ დაყენებულ არს ჰელისდასხმა მღვდელთმთავრობითი სხუასა ეკლესიასა შინა; ხოლო თუ სადმე იკადროს ვინ გარდასღვად კანონისა ამის წუენისა, ჰელისდამსხმელიცა იგი კრებას და ჰელთდასხმულიცა იგი განკუეთიდ არნ“ (ეკლესიის კალენდარი... 1976:73). იქვე, სქოლიოში გაკეთებულია გამომკვამლის შენიშვნა, რომელიც გვამცნობს, რომ ერთხანს (XX სუკუნის 20-იანი წლებიდან 80-იან წლებამდე) სამღვდელთმთავრო ქიროტონის წესი თბილისის სიონის ტაძარშიც სრულდებოდა, რადგანაც საქართველოს საკათოლიკოსო საბჭოს 1921 წლის 18 ოქტომბრის დადგენილებით დახსნილ და დაყენებულ იყო ზემოხსენებული წყევლა, და სამღვდელთმთავრო ქიროტონის შესრულება მცხეთის სვეტიცხოვლის გარეთ – სხვა საკათედრო ტაძრებშიც იქნა დაშვებული. კათოლიკოსად კურთხევა კი უთუოდ სვეტიცხოვლის საპატრიარქო ტაძარში უნდა შესრულდებულიყო (იხ.: აგრეთვე: ტიპიკონი, 2006:89).

ბოძს, რომ მას კათოლიკოსად არჩევისთანავე გამოუკითხავს ეპისკოპოსთა კურთხევის ამბები და აღმოუჩენია, რომ მისი კათოლიკოსად კურთხევისას სხვადასხვა მიზეზის გამო რამდენიმე ეპისკოპოსი უკურთხებელი ყოფილა. მას გადაუწყვეტია მათი კურთხევა ეპისკოპოსად და, როგორც წესი მოითხოვდა, უკურთხებია კიდევ მთავარ ეკლესიაში, ე. ი. სვეტიცხოვლის ტაძარში. მხოლოდ „მროვლისა ეპისკოპოსისა ტიმოთეს“ კურთხევის წესი დაურღვევია „ზამთრისა ცა სასტიკებისაგან და დედოფლისა ცა იძულებითა“ (გულაბერისძე, 2007:56), – როგორც ჩანს, რუისის მონასტერს ბურდუხან დედოფალი მეურვეობდა, – მიუხედავად საუკუნეების მანძილზე დაკანონებული წესისა, და თავის ეკლესიაში, ე. ი. საკათალიკოსო კარის ეკლესიაში⁸, უკურთხებია, ნაცვლად „კათოლიკე ეკლესიისა“, ე. ი. სვეტიცხოვლის ტაძრისა. ყოველივე ამის შესახებ თავად ნიკოლოზ გულაბერისძე მოგვითხრობს, რისთვისაც დავიმოწმებთ ტექსტს „საკითხავიდან“: „ერთი მათანა ეპისკოპოსი უკურთხებელი იყო რუისისა საყდრისად, ხოლო საყდრისა მის ზრუნვად და საურავი ჯელ-ყო დედოფალსა ბურდუხანს. ხოლო ვითარცა არს წესი და ჩუეულება დასაბამითგან ამის კათოლიკე ეკლესიისა, არადვე მე ეგრეთ მომიჭდა მის მროვლისა ეპისკოპოსისა ტიმოთეს კურთხევაი ზამთრისა ცა სასტიკებისაგან და დედოფლისა ცა იძულებითა, არამედ წინაუკუმოვეავ, რამეთუ თვთ თავისა საყდარსა შინა ვაკურთხე დედოფლისა ცა ხუაიშნითა და მიზეზითა ზამთრის სიმძვნვარისათა, რამეთუ წესი და ჩუეულება ამის კათოლიკე ეკლესიისად ესრეთ ყოფილ არს დასაბამითგან, რადთა კურთხევადნი ეპისკოპოსნი წინაშე სუეტისა ცხოველისა მოვიდოდნიან და აღთქემასა ჰყოფდინ მრავლისა სარწმუნოებისათვს და ერთგულებისათვს კათოლიკე ეკლესიისა და თავისა და სულისა დადებისათვს, ვიდრე სისხლთა დათხევადმდეცა პატრიარქისათვს და საღმრთოთა წესთა დაცვი-

⁸ ი. ჯავახიშვილმა აღნიშნა, რომ ნიკოლოზმა მროველი ეპისკოპოსი „თავადს ეკლესიაში“, ე.ი. საკათალიკოსო კარის ეკლესიაში აკურთხა, ე. ი. „თავადს ეკლესიაში“ გაგებულია როგორც საკათალიკოსო ეკლესია (ი. ჯავახიშვილი, 1977).

სათვს, და ესრეთდა კურთხევად ამას თავადსა საყდარსა შინა. ხოლო ესე წესი მე უკუე დაგვსენ უმეცრებითა და იმით ზემოწერილითა იძულებითა“ (გულაბერისძე, 2007:56).

როგორც დამოწმებული ეპიზოდებიდან ჩანს, ნიკოლოზ გულაბერისძეს ეპისკოპოსთა კურთხევის წესი დაურღვევია. მროველი ეპისკოპოსის კურთხევის დამესვე „ღმრთისმოყუარესა ვისმე სარწმუნოსა კაცსა“ ძილში გამოეცხადა სვეტი ცხოველი „სახედ მოხუცებულისა ბერიკაცისა მიუთხრობელთა რადთმე ბრწყინვალებითა“ (გულაბერისძე, 2007:56) და საქართველოს კათოლიკოსი ნიკოლოზ გულაბერისძე საეკლესიო კანონის დარღვევაში ამხილა: „აწ რომელი-ესე ყო ნიკოლოზ ქართლისა კათალიკოსმან, თვნიერ წესისა და ჩუეულებისა ქმნა ესე კურთხევად, აწ სულგრძელებით თავსმიც უმეცრებისათვს თქუენისა და თანა-წარვჭდი კაცთმოყუარებით აწინდელსა ცთომასა, ხოლო კუაღად ნუმცადა ოდენ კადნიერებულ არს, რადთამცა ებისკოპოსი, თვნიერ საყდრისა ჩემისა, გარეთ იკურთხა და დიდებად სახელისა ჩემისაჲ კიდე-განგებულ იქმნა, ანუ ვითარ ჰგონებთ შეურაცხებასა საყდრისა ჩემისასა დუმილით თანაწარვჭდასა, ესე უწყოდეთ, რომელ ამიერითგან არღარა ოდეს დავიდუმო და არცა თავს-ვიდვა ყოველთა ამის საქმისა მკადრებელთათვს“ (გულაბერისძე, 2007:56-57).

დამოწმებული ტექსტი ადასტურებს, თუ როგორ განუცდა ნიკოლოზ გულაბერისძეს ეპისკოპოსთა კურთხევის წესის დარღვევასთან დაკავშირებული ჩვენება, ღმერთმა მას ამჯერად მიუტევა, მაგრამ გააფრთხილა, რომ სხვა დროს არ დაერღვია იგი, წინააღმდეგ შემთხვევაში, დაისჯებოდა. ეს ფაქტი ნიკოლოზს წარმოაჩენს იმგვარ ღრმადმორწმუნე და ღვთისმოშიშ პიროვნებად, რომლისთვისაც ყოველი საღვთისმსახურო წესის აღსრულება კანონი იყო. ნიკოლოზ კათოლიკოსი თვითონვე აღიარებს საეკლესიო წესის დარღვევას და ამით იმასაც მიგვანიშნებს, რომ ვინც არ უნდა იყოს წესდების დარღვევის ინიციატორი, თუნდაც დედოფალი, სახელმწიფოს პოლიტიკური წრეებისა თუ სასულიერო წოდების უმაღლესი იერარქი, საღვთო წესების დარღვევა დაუშვებელია, ვინაიდან საღვთო წესები სულიწმიდის მეშვეობით ეძლევა და ღმერთის მიერაა დადგენილი. სა-

ქართველთა კათოლიკოსი აღიარებს თავის შეცდომას, ცოდვად აღიქვამს მას და ჩვენების ხილვით გვამცნობს, რომ ამიერიდან აღარ დაარღვევს საეკლესიო კანონებს. ამ ფაქტით ნიკოლოზ გულაბერისძემ ისიც აჩვენა, რომ კათოლიკოსი თავად უნდა ყოფილიყო საეკლესიო კანონმდებლობის დაცვის გარანტი და სხვებისგანაც უნდა მოეთხოვა ერთხელ დადგენილი წესების დაცვა. ამ ეპიზოდით კათოლიკოსის ფსიქოლოგიური სახეც იკვეთება.

ნარატიული წყაროები, ისტორიული დოკუმენტები მიუთითებენ, რომ ნიკოლოზი კათოლიკოსობიდან გადადგა, რის შემდეგაც იგი ჯერ ათონზე, შემდეგ იერუსალიმს წასულა. თამარის ისტორიკოსი აღნიშნავს, რომ ნიკოლოზ გულაბერისძე უსათნოესი და დვთაებრივი თვისებების მქონე პიროვნება ყოფილა. ამიტომ ძნელდება იმ კონკრეტული მიზეზის დადგენა, რამაც აიძულა იგი, გადაამდგარიყო კათოლიკოსობიდან. ბასილი ეზოსმოძღვარმა აღნიშნა: „რომელსა სიმდაბლისა ძლითა ეჯმნა ქართლისა კათალიკოსობისაგან“. ეს ერთადერთი ფრაზაა, რომელიც ნიკოლოზის კათოლიკოსობიდან გადადგომას გვამცნობს. ხოლო რას გულისხმობს ეს სიმდაბლე, ბოლომდე გარკვეული არ არის, თუმცა, სამეცნიერო ლიტერატურაში გამოითქვა მოსაზრება, რომ ეს ფაქტი დემნა ბატონიშვილის აჯანყებასა და მამისავე სიცოცხლეში თამარის გამეფებას უკავშირდება, რაც გაზიარებულ იქნა. ნიკოლოზის კათოლიკოსად მოღვაწეობის დროინდელი ისტორიული რეაქციების გათვალისწინება გვაფიქრებინებს, რომ მისი გადადგომა უკავშირდება 1177 წლის დემნა ბატონიშვილის აჯანყებას, ამის შემდეგ მოწვეულ საეკლესიო კრებას, რომელზეც სამეფო ტახტის მემკვიდრის, თამარის გამეფების საკითხი უნდა განხილულიყო.

ზემოთ აღინიშნა, რომ საისტორიო წყაროებსა და სამეცნიერო ლიტერატურაში ზუსტ მითითებას კათოლიკოსის გადადგომის მიზეზის შესახებ ვერ ვხვდებით. პრობლემაზე მსჯელობისათვის გასათვალისწინებელია კათოლიკოსის, როგორც სახელმწიფო მოღვაწის, როლი და ფუნქცია; კათოლიკოსი ერის სულიერი წინამძღოლია, ამავე დროს, იგი სახელმწიფო მოღვაწეა. ზემოთ დავიმოწმეთ ნიკოლოზ გულაბერისძის სახელმწიფოებრივი მოღვაწეობის შესახებ ივანე ჯავახიშვილისეული შეფასება. მისი მსჯელობა „ქარ-

თლის ცხოვრებისა“ და სხვა დოკუმენტური წყაროების მონაცემებზე დაყრდნობით ორიენტირად გვევლინება პრობლემის არსის გასარკვევად (ჯავახიშვილი, 1977:396-409).

გარდა ამისა, საჭიროდ მიმაჩნია კათოლიკოსის წოდების მქონე სასულიერო პირთა ადგილის განსაზღვრა და მისი არსის, მისი მიმართების დადგენა-დაზუსტება ჭყონდიდელ-მწიგნობართუხუცესის თანამდებობასთან. საქართველოს ცენტრალიზებული სახელმწიფოს არსებობის პერიოდში, ძირითადად ეს შეეხება პერიოდს დავით აღმაშენებლის მეფობიდან XIII საუკუნის დასასრულამდე, კათოლიკოს-პატრიარქისა და ჭყონდიდელ-მწიგნობართუხუცესის სტატუსის, ადგილისა და როლის განსაზღვრა სამეფო ხელისუფლებასა და საზოგადოებრივ ცხოვრებაში წარმოგვიჩენს ნიკოლოზ გულაბერისძის სტატუსსა და ფუნქციას თავისი თანამედროვე საქართველოს ეკლესიისა და სახელმწიფოს პოლიტიკურ ცხოვრებაში, დაგვეხმარება საზოგადოებრივ ცხოვრებაში მისი ადგილის დადგენაში. საისტორიო წყაროების მიხედვით, X საუკუნის 80-იანი წლებიდან მოყოლებული, საქართველოს სულიერი წინამძღვრები, უპირველესი მღვდელთმთავრები უკვე კათოლიკოს-პატრიარქებად მოიხსენიებიან⁹, რითაც ამ ტიტულის მქონეთა სტატუსი და უფლებამოსილებები განისაზღვრება. XI-XII საუკუნეთა მიჯნაზე დავით აღმაშენებელმა თავისი მეფობის დასაწყისშივე უმნიშვნელოვანესი ნაბიჯი გადადგა, როდესაც საერო თანამდებობა მწიგნობართუხუცესისა და სასულიერო წოდების თანამდებობა ჭყონდიდელი მთავარეპისკოპოსისა გააერთიანა. ამის შედეგი ის იყო, რომ, ფაქტობრივად, მეფის შემდეგ სახელმწიფოში ყველაზე დიდი თანამდებობა ჭყონდიდელ-მწიგნობართუხუცესობა იყო, რომელზეც სასულიერო პირები ინიშნებოდნენ. თუმცა, ჭყონდიდელ-მწიგნობართუხუცესს სასულიეროსთან ერთად საერო საქმიანობის წარმართვა უწევდა. ხშირად მხედართმთავრის ფუნქციაც ეკისრებოდა.

⁹ X საუკუნეში, საქართველოში დავით კურაპალატის ზეობის ხანაში, მღვდელთმთავარი იოანე I ოქროპირი პარხლის ტაძრის წარწერაში პირველადაა დამოწმებული პატრიარქის ტიტულით (980-1001). ესაა საქართველოს კათოლიკოსის აქამდე (კნობილი უძველესი დასახელება პატრიარქის ტიტულით (თაყაიშვილი, 1960; ხილოგავა, 2003: 298-303).

შ. მესხიამ აღნიშნა, რომ საქართველოს მეფის ვაზირი, როგორც საეკლესიო ხელისუფალი (ჰყონდიდელი ეპისკოპოსი), უმემკვიდრო იყო და საკუთარი სამკვიდრო ქონების უქონელიც“ (მესხია, 1986:31), რის გამოც მას ვერ ექნებოდა სხვა თანამდებობებისათვის დამახასიათებელი ფეოდალური მიკერძოებები, მემკვიდრეობითობა, სიმდიდრისაკენ ღტოლვა. ჰყონდიდელ-მწიგნობართუხუცესი საერო და სასულიერო მიმართულებით იკავებდა თანამდებობას, რომლის შინაარსის გათვალისწინება მიგვითითებს კათოლიკოს-პატრიარქზე მის აღმატებულობას, რადგან კათოლიკოს-პატრიარქს საერო საქმეში ჩარევა და წარმართვა არ ხელეწიფებოდა. ჰყონდიდელ-მწიგნობართუხუცესები „სამეფო ოჯახის უახლოესი ვასალური წრიდან იყვნენ, მათთან „გაზრდილ-გამზრდელობით“ (გიორგი ჰყონდიდელ-მწიგნობართუხუცესის შემთხვევაში, ნათესაობითიც) დაკავშირებულები ჩანან“¹⁰ (სურგულაძე, 2012:160; იხ. აგრეთვე: ანთელავა, 1983:105-107). ეს ყველაზე ნათლად გიორგი ჰყონდიდელ-მწიგნობართუხუცესის მოღვაწეობიდან ჩანს¹¹, რასაც მის მიერ საომარი ოპერაციების წარმართვა მოწმობს. ეს ტენდენცია გიორგი მესამისა და თამარის ეპოქაშიც გრძელდებოდა.

სამეცნიერო ლიტერატურაში განხილულია, თუ როგორი იყო კათოლიკოს-პატრიარქისა და ჰყონდიდელ-მწიგნობართუხუცესისადმი მეფის დამოკიდებულება, მიმართება ამ ორ თანამდებობას შორის, მათი სტატუსი და იურისდიქცია. „დავით აღმაშენებელმა ჰყონდიდელ-მწიგნობართუხუცესის რანგში არ აამაღლა საქართველოს ეკლესიის მეთაური – ქართლის კათოლიკოსი, როცა ბიზანტიური გამოცდილების გათვალისწინებით ფორმალურად ეს მოსალოდნელი იყო.

¹⁰ მ. სურგულაძის დაკვირვებით: „ჩვენთვის ცნობილ წყაროთა მიხედვით, ჰყონდიდელ-მწიგნობართუხუცესები მუდამ დასავლეთ საქართველოს არისტოკრატიულ საგვარეულოებს (მაგ., ქვაბლისძე, გლონისთავისძე) ეკუთვნოდნენ“ (სურგულაძე, 2012:160).

¹¹ სამეცნიერო ლიტერატურაში მითითებულია, რომ პირველი ჰყონდიდელ-მწიგნობართუხუცესი იყო დავით აღმაშენებლის „ძლიერ ახლობელი, მისი „თანააღზრდილი და გამზრდელი“, დიდი სახელმწიფო მოღვაწე გიორგი ჰყონდიდელი“ (მესხია, 1986:31-32; ლორთქიფანიძე, 1979:218), რაც გაზიარებული მოსაზრებაა.

ჭყონდიდელ-მწიგნობართუხუცესზე არჩევანის შეხერხებით მეფემ მოახერხა შეეკვეცა ქართლის კათალიკოსის საეკლესიო ადმინისტრირების უფლება და, როგორც ჩანს, საგადასახადო იმუნიტეტიც, რომლითაც, როგორც მელქისედეკის დაწერილიდან და სხვა მოღწეული საბუთებიდან ვიცით, საქართველოს ეკლესია-მონასტრები ფართოდ სარგებლობდნენ (აქ მ. სურგულაძესთან მითითებულია „ძველი ქართული ისტორიული საბუთების კორპუსი“, 1984, გვ. 27 – ნ. ს.). ამ დონისძიებით მეფემ ეკლესია მთლიანად სამეფო ხელისუფლების კონტროლქვეშ მოაქცია და ცენტრალიზმის იდეას დაუმორჩილა“ (სურგულაძე, 2012:159). მ. სურგულაძის ეს მოსაზრება უადრესად მნიშვნელოვანია. ვფიქრობ, გიორგი ჭყონდიდელ-მწიგნობართუხუცესის სიახლოვე სამეფო ოჯახთან ამ თანამდებობაზე მისი არჩევის მთავარი და განმსაზღვრელი ფაქტორი იყო. ყოველივე ეს გასათვალისწინებელია ნიკოლოზ გულაბერისძის პიროვნების სრულყოფილად წარმოსახენად, აგრეთვე, კათალიკოსობიდან მისი გადადგომის მიზეზების ასახსნელადაც.

ვფიქრობ, უწინარეს ყოვლისა, სწორედ ამიტომაც აუცილებელი იმ ფაქტების გახსენება, თუ როგორ და რა ვითარებაში გამეფდა გიორგი მესამე, რასაც ლოგიკურად უკავშირდება მისი ძმისწულის აჯანყების მიზეზების მოძიებაც. თუ მიუდგომლად გავაანალიზებთ დემნას აჯანყებასთან დაკავშირებულ ამბებს, მართალია, დავინახავთ სამართლებრივ გადაწყვეტილებას, მაგრამ კანონის იმ სისასტიკესაც, რომლითაც მეფე გიორგი მესამე გაუსწორდა თავის ძმისწულს, ტახტის კანონიერ მემკვიდრეს, მემამულიანის მიერ დადებითი თვისებებით შემკულსა და გამორჩეული გარეგნობით წარმონედილს. თამარის ანონიმი ისტორიკოსი თავის თხზულებაში – „ისტორიანი და აზმანი შარავანდედთანი“ – დავით მეხუთის ძეს, დავით აღმაშენებლის შვილიშვილის შვილს, მართალია, თავისი ოჯახის შვილობის ღირსეულ წარმომადგენლად მიიჩნევს: „სახე-კეთილი და ყოვლითა ხელითა მარჯუე, ნასწავლი, მსგავსი სახლის შვილობისა მათისა“ (ქართლის ცხოვრება, 1959:18), მაგრამ იმასაც დაუფარავად და სამართლიანად აღნიშნავს, რომ დემნასა და მის წინაპრებს ზოგჯერ უკანონობა და ღვთის საწინააღმდეგო საქმეც ჩაუდენიათ; აქ იგულისხმება დავით მეხუთის ამბოხი მამის წი-

ნააღმდეგ, დემეტრე-დამიანეს მეორედ გამეფება და თანამოსაყდრედ უმცროსი ვაჟის, გიორგის არჩევა, დემნას აჯანყება ბიძის წინააღმდეგ: „გარნა რომელი ცუდ იქმს ყოველთა სიკეთეთა და სწავლულებათა, სახე-უკლებობათა და ჭაბუკებათა, იგი ექმნა მკლველ და შემმწარებელ უამთა ცხორებისა მისისათა: უშიშობა დმრთისა და გარდამავლობით მოქმედება სჯულისა ქრისტეს მცნებათასა, ვითარ თანაშთამომავლობა და გუართა უბედურობა ამის სამეფოსა კაცთა“ (ქართლის ცხოვრება, 1959:18), ე. ი. ის, რაც დემნა ბატონიშვილს დაატყდა თავს, ისტორიკოსს კანონზომიერად მიაჩნია სამართლებრივი თვალსაზრისით. ამავე დროს, არ უნდა დაგვავიწყდეს, თუ ვინ, რა იდეოლოგიის მქონე მწერალი წერს ამ ისტორიულ თხზულებას! მისი ავტორი სამეფო იდეოლოგიის არამცთუ მხოლოდ მომხრე, არამედ აპოლოგეტია! იგი მეფეთა, სამეფო ტახტის მფლობელთა შესახებ წერს პანეგირიკული ხასიათის თხზულებას. რადგან უფლისწული დადებითადაა შეფასებული, ამიტომ მის თხზულებაში საუბარი დემნას გარეგნულ მშვენიერებასა და განსწავლულობაზე სავსებით ობიექტური ჩანს. არც ის უნდა გამოვრიცხოთ, რომ პიროვნულად ისტორიკოსი დემნას წინააღმდეგი არ იყო, მაგრამ სამეფო პოლიტიკური კურსი მოითხოვდა იმგვარი აზრის გამოხატვას, რაც გამოთქმულია თხზულებაში, ხოლო მასში უთუოდ იკითხება მისი ტრაგიკული ხვედრით გამოწვეული გულისტკივილი, განცდები, რომ ბაგრატიონთა სამეფო ოჯახის გვარჩამომავლობისათვის შეუფერებელი ამბავი ამ ოჯახში რამდენჯერმე დატრიალებულ.

ივანე ჯავახიშვილმა სახელმწიფო სამართლის პრობლემატიკის განხილვისას შეაფასა დემნას აჯანყება და განაცხადა: „1177 წელს საქართველოს ამირსპასალარი ივანე ორბელის მეტაურობით გიორგი მესამის წინააღმდეგ დიდი აჯანყება ატყდა, რომელშიაც განდგომილებმა გიორგის ძმისწული, უფლისწული დემნა გარიეს. თავდაპირველად ორბელთა საგვარეულოს გარდა ამ აჯანყებაში ბევრი დიდგვარიანი აზნაური იღებდა მონაწილეობას. ყველაზე სახიფათო ის იყო, რომ განდგომილების მოთავედ და ხელმძღვანელად საქართველოს სამეფოს სამხედრო ვეზირი, ამირსპასალარი იყო, სწორედ ის ხელისუფალი, რომელიც

ჯარს მეთაურობდა ხოლმე და საქართველოს ყოველი სამხედრო საიდუმლოება და ნაკლი კარგად იცოდა, ხოლო მონაწილეთა შორის ისეთი დიდი მოხელეები ერივნენ, როგორიცაა მეჯინიბეთ-უხუცესი ქავთარ ივანეს ძე, ქართლის ერისთავი ლიპარიტ სუმბატის ძე და მრავალნი სხვანიც. გიორგი მესამე დიდ განსაცდელში ჩავარდა, ქვეყანასაც დიდი საფრთხე მოელოდა, რათგან აჯანყებულმა ამირსპასალარმა ქართლის ერისთავი და მეჯინიბეთ-უხუცესი სპარსეთში წარავლინა იქითგან საქართველოს მეფის წინააღმდეგ სპარსთა მეშველი ჯარის მოსაყვანად. ასეთი უკიდურესი განსაცდელის დროს თავგანწირული ერთგულება სწორედ მუდმივი ჯარის შემადგენლობითგან გამოსულმა პირმა გამოიჩინა, სახელდობრ ნაყივხადარმა ყუბასარმა. გიორგი მესამემ აჯანყებულთ სძლია და მონაწილენი დანაშაულებისდა მიხედვით დასაჯა“ (ჯავახიშვილი, 1984:109). ცხადია, სახელმწიფო სამართალი მოითხოვდა დამნაშავეთა დასჯას, ხოლო სახელმწიფოს მოღალატის სტატუსის მქონე პირთათვის სასჯელი ძალიან მკაცრი იყო და იგი აღსრულდა კიდევ. „ისტორიანი და აზმანი შარავანდედთანის“ ავტორი დემნას საქციელს, როგორც შჯულის, სამართლის დარღვევას, უწოდებს „გარდამავლობით მოქმედებას“, რაც სისხლის სამართლის საქმეს განეკუთვნებოდა. ისტორიკოსი ამ ფაქტს აფასებს, როგორც „გარდამავლობითა მოქმედება სჯულისა ქრისტეს მცნებათა“ (ჯავახიშვილი, 1984:189)¹². თავის მხრივ, ამ ტიპის დანაშაული, „გარდამავლობით მოქმედება“ განსაკუთრებით სასტიკ სასჯელს ითვალისწინებდა.

აქ განსაკუთრებულ ყურადღებას იქცევს დასჯის ფორმა და სისასტიკე, როგორ მოექცა გამარჯვებული მეფე თავის დამარცხებულ, ოდენ სიცოცხლის შენარჩუნების მავედრებელ ძმისწულს, სამეფო საგვარეულოს – სამეფო ოჯახის წარმომადგენელთაგან დარჩენილ ერთადერთ მამაკაცს, რომელმაც პრეტენზია გამოთქვა საქართველოს სამეფო ტახტის მემკვიდრეობაზე. დემეტრე//დემნას სამეფოდ რომ არ

¹² „გარდამავლობით მოქმედება“ და „გარდაჯდომა“ მსგავსი მნიშვნელობის მქონე იურიდიული ტერმინებია. დავით აღმაშენებელი თავის „გალობანში“ იყენებს ტერმინს „გარდაჯდომას“: „ბოროტად გარდაჯკვდ საზღუართა...“, რასაც თავის ერთ-ერთ ცოდვად მიიჩნევს.

ამზადებდნენ, იმითაც დასტურდება, რომ იგი ჩვენთვის უცნობი მიზეზის გამო სამეფო ოჯახის შვილზე არ დაქორწინებულა, რითაც, ფაქტობრივად, მას გზა მოეჭრა სამეფო ტახტისაკენ. მეფის ძეს, ტახტის მემკვიდრეს ცოლად უთუოდ მეფის ასული უნდა შეერთო, რადგან სამეფო ოჯახის წარმომადგენლის, განსაკუთრებით კი ტახტის მემკვიდრის ქორწინება იყო პოლიტიკური და არა გრძნობაზე დამყარებული ქორწინება (ეს პრინციპი XIII საუკუნის დასაწყისში გიორგი IV-ემ, თამარის ძემ, დაარღვია). ამასთან, ჯერ კიდევ ყველას კარგად ახსოვდა, რომ მამამისმა დავით მეხუთემ ტახტი წარსტაცა მამას – დემეტრე პირველს, დამიანეს სახელით ბერად აღკვეცილს, მომავალ მეფედ „**მარჩვეელს ძისა უმრწემესისა გიორგისა**“, ხოლო უფროსი ვაჟის, დავითის, გამეფების შემდეგ ისტორიკოსმა ბიბლიური აღუზიის მოხმობით შეაფასა მონაზვნად აღკვეცილი მამის განცდები: „**მარჩვეული ძისა უმცროსისა მლარწველი მკიცხველი იქმნა, ვითარისაკი იაკობისადმი**“ (ქართლის ცხოვრება, 1959:3).

დეტალურად არაა ცნობილი, რატომ ამჯობინებდა დემეტრე მეფე „შენ ხარ ვენახის“ ავტორი, უმცროს ვაჟს და არ სურდა უფროსი შვილის გამეფება, რომელმაც მიმძლავრებით შეძლო მამისავე სიცოცხლეში სამეფო ტახტის დაუფლება, ისიც მხოლოდ რამდენიმე თვით. დემეტრე პირველი დამიანეს სახელით ბერად აღიკვეცა გარეჯში, იოანე ნათლისმცემლის სახელობის მონასტერში, და საერო ცხოვრებას გაეცა. დავითის გარდაცვალების შემდეგ სამეფო ტახტი მის მემკვიდრეს, მცირეწლოვან დემეტრე/დემნას უნდა დაეკავებინა. მაგრამ თავისი ძის, ტახტის მიმძლავრებლის დავით მეხუთის გაურკვეველ ვითარებაში გარდაცვალების შემდეგ დემეტრე-დამიანე მონასტრიდან გამოვიდა, სამეფო ტახტს დაუბრუნდა და თანამოსაყდრედ აირჩია თავისი უმცროსი შვილი გიორგი მესამე, სხვა ვაჟი მას არც ჰყავდა, და არა შვილიშვილი, მცირეწლოვანი დემნა, რაც, ქართული საისტორიო წყაროთა ნაწილის მიხედვით, სამეფო ტახტის გადაცემის ლეგიტიმური წესების დარღვევა იყო, რადგან სამეფო ტახტის მემკვიდრისათვის გადაცემის ლეგიტიმური წესების გათვალისწინებით სამეფო ტახტი დემნას, დავით

მეხუთის მცირეწლოვან ძეს, ეკუთვნოდა¹³. მაგრამ გასათვალისწინებელია ის გარემოება, რომ დემეტრე-დამიანეს მეორედ გამეფება, როგორც ჩანს, კონცეპტუალური გადაწვეტილება იყო, რადგან ეს ფაქტი საფუძველს იძლეოდა ტახტის მემკვიდრედ მისი ძე გიორგი ყოფილიყო მინიწი და არა შვილიშვილი. დემეტრე-დამიანე მალე, 1156 წელს გარდაიცვალა და ტახტს პოლიტიკურ გართულებათა გარეშე დაეუფლა გიორგი მესამე. ყოველივე ეს გასათვალისწინებელია 1177 წელს საქართველოს სამეფო კარზე დატრიალებული ტრაგედიის რაობისა და სიმწვავის შესაფასებლად. ვინ უნდა ყოფილიყო ტახტის მემკვიდრე? თამარ გიორგი მესამის ასული თუ დემნა ბატონიშვილი, გიორგი მესამის ძმისწული? ცხადია, ამას უკავშირდება თამარის გამეფებას-

¹³ სამეფო ტახტის მემკვიდრისათვის გადაცემის ლეგიტიმური წესის გამონაკლისებზე მიუთითებს საქართველოში მომხდარი შემდეგი ისტორიული ფაქტი: X საუკუნის ჰაგიოგრაფი გიორგი მერჩულე თავის თხზულებაში აღნიშნავს, რომ წმ. მეფე აშოტ კურაპალატის მოღალატის მიერ მოკვლის შემდეგ მისი ვაჟები შეთანხმდნენ, რომ სამეფო ოჯახის მეთაურობა და მეფობა უნდა დაკისრებოდა უფროს და უმრწემეს ძმებზე სიბრძნით, დიპლომატიური უნარითა და ცოდნით აღმატებულ შუათანა ძმას ბაგრატს, რომელმაც, მამის მსგავსად, კურაპალატობის ხარისხიც მიიღო (ძეგლები, 1963/1964:272). საქართველოს ტახტის მფლობელნი სწორედ მისი შთამომავალნი გახდნენ; ი. ჯავახიშვილი წერს: „...უხეჩაესი უფლება აშოტის მთელ შთამომავლობას ეკუთვნოდა, აშოტის შვილები ერთად განაგებდნენ საქვეყნო საქმეებს... მაგრამ მაშინაც უკვე ერთი ამ სამთავანი, სახელდობრ, შუათანა, უფროსად ითვლებოდა... შემდეგს თაობაში ერთი წევრი საგვარეულოში ყველაზე უფროსად ითვლებოდა და სანამ მეფობა დაწესდებოდა, ანუ 888 წლამდე, როგორც ჩანს, უფროსად ის იყო, ვისაც კურაპალატობა ჰქონდა. ამ უფროსს, ჯერ კურაპალატად, ხოლო მერე მეფედ წოდებულს, სხვები ემორჩილებოდნენ ვითარცა ერისთავთ-ერისთავნი და ერისთავი“ (ქართველი ერის ისტორია, II, გვ. 114). ვფიქრობ, რომ ამას საფუძველად უნდა დადებოდა იაკობისა და მისი ძის იუდას ბიბლიური ჰიპოდიგმა; ბიბლიური იაკობის შვილთაგან გამოირჩა იუდა – იგი არაა იაკობის უფროსი შვილი, იუდას სამი უფროსი ძმა ჰყავდა: რუბენ, სვიმეონ და ლევი; მაგრამ სწორედ ის გახდა ბიბლიურ მეფეთა წინაპარი. მისი წამომავალია მეორე მეფე ისრაელისა დავით წინასწარმეტყველი, რომლის შთამომავლობას ხვდა წილად ისრაელის მეფობის პატივი და რომელსაც ქართული საისტორიო და ჰაგიოგრაფიულ-ჰიმნოგრაფიული წყაროები უკავშირებენ ქართველ ბაგრატიონთა სამეფო საგვარეულოს.

თან დაკავშირებული სირთულეები და გამეფების წინ განვითარებული მოვლენები, რადგან დემნა უფლისწულის სიკვდილის შემდეგ, როგორც ივანე ჯავახიშვილი წერდა „ქართველი ერის ისტორიის“ მეორე ტომში, „საქართველოში სამეფო გვარის მამრობითი შთამომავალი აღარავინ დარჩა: გიორგი მესამეს, ქალიშვილის თამარის მეტი, არავინ ჰყოლია. აჯანყებამ გიორგი დაარწმუნა, რომ საქართველოს სახელმწიფოებრიობა შინაგანი უთანხმოებისა და ბრძოლისაგან უზრუნველყოფილი არ იქნებოდა, თუ რომ ტახტის მემკვიდრეობის საკითხი მისი სიცოცხლის დროშივე არ გადაწყდებოდა“ (ჯავახიშვილი, 1983:368)¹⁴.

„ქართლის ცხოვრებიდან“ ცნობილია, რომ დემნას აჯანყებას ძალიან მალე მოჰყვა სასულიერო პირთა შეკრება. სამღვდელოებამ ისარგებლა ქვეყანაში შექმნილი რთული პოლიტიკური ვითარებით და მოითხოვა ეკლესიის გათავისუფლება ბეგარისაგან. ივანე ჯავახიშვილის შეხედულებით: „როგორც ეტყობა, სამღვდელოებასა და ბერებს მოუფიქრიათ, რომ ამაზე მარჯვე დროს მალე ვერ მოესწრებოდნენ, და თავიანთთვის შეღავათის მისაღებად და შეუვალობის კვლავ მოსაპოვებლად შეერთებული ძალით შებრძოლება და მეფისათვის სათანადო მოთხოვნის წარდგენა გადაუწყვეტიათ. სწორედ „ამის მიზეზისათვის შეკრბეს ყოველნი... მონაზონნი და ებისკოპოსნი იმერნი და ამერნი, კათალიკოზი, მოძღუარნი და ყოველი მეუდაბნოენი“ და გიორგი მესამეს ეკლესიის „გაჭირვებული“ (იგულისხმება ეკონომიური მდგომარეობა – ნ. ს.) მდგომარეობის გარემოება მოახსენეს, თანაც „ყოვლისა ბეგარისა უსამართლოდსა და დაჭირვებულისაგან ხსნად და განთავისუფლებად“ სთხოვეს“ (ჯავახიშვილი, 1984:110). როგორც „ქართლის ცხოვრება“ გვაუწყებს და მის საფუძველზე ი. ჯავახიშვილი ასკვნის, მეფემ დიპლომატიური გადაწყვეტილება მიიღო, შეეცადა „თავისი თანხმობა

¹⁴ ამ პრობლემატიკის შესახებ საკმაოდ მდიდარი უცხოური საისტორიო წყაროები არსებობს, მაგ., სომხური, ბიზანტიური, არაბული, სპარსული (მხითარ გოში, სტეფანოს ორბელიანი, ვარდანი...), რომელთა განხილვისა და დამოწმების აუცილებლობა ჩვენი მიზანდასახულობა არ არის. სამეცნიერო ლიტერატურაში ისინი აქტიურადაა გამოყენებული და შესწავლილი.

ნებაყოფლობითად მოეხვეწებინა და უსიამოვნო მარცხი დიპლომატიური ენამოქარგულობით დაეფარა“ (ჯაგახიშვილი, 1984:110). ამიტომ მან დაიმოწმა ერთ-ერთი სიგელიდან გიორგი მესამის სიტყვები, რომლის მიხედვით, ასეთი შეთქმულების დაძლევის შემდეგ საჭირო იყო ღმერთისთვის „სამადლობელი“ მიერთმია და ეკლესია ამიტომაც გაათავისუფლა გადასახადებისაგან (სამართლის ძეგლები... 1964:24). ტექსტი იმასაც მიუთითებს, რომ ეკლესია მატერიალურად საკმაოდ შეჭირვებული იყო და გიორგი მესამემ ამ გადაწყვეტილებით, მისი აღსრულებით სასულიერო წოდების წარმომადგენლების, მთელი საზოგადოების მხარდაჭერა მოიპოვა და თანაგრძნობა დაიმსახურა.

საისტორიო წყაროები არაფერს გვეუბნებიან იმის შესახებ, თუ ვინ იყო თამარის მეფედ პირველი კურთხევის წინა ხანებში საქართველოში კათოლიკოსი, ნიკოლოზ გულაბერისძე თუ მიქაელ მირიანის ძე. კათოლიკოსი სახელის მოუხსენიებლად და დასახელებული. ზემოთ უკვე აღვნიშნეთ, რომ ნიკოლოზ გულაბერისძე ბურდუხან დედოფლის თანამედროვე კათოლიკოსი იყო, რასაც მოწმობს მისი „საკითხავის“ ტექსტი (გულაბერისძე, 2007:53). „ისტორიანი და აზმანი შარავანდედთანი“ გვაუწყებს, რომ ბურდუხან დედოფალი დემნას აჯანყების, მისი ჩახშობის, საეკლესიო კრებისა და თამარის პირველი გამეფების შემდეგ მალე გარდაიცვალა. არც ამ შემთხვევაშია საქართველოს კათოლიკოსი სახელით მოხსენიებული. გიორგი მესამის გარდაცვალებისას, – იგი გარდაიცვალა კახეთში, სტაგირს, 1184 წლის 27 მარტს, – კათოლიკოსი იყო მიქაელ მირიანის ძე, რომელსაც ისტორიკოსი გიორგის თბილისს წახვეწებასა და დასაფლავებასთან დაკავშირებით ახსენებს. ამ დროს ნიკოლოზ გულაბერისძე იერუსალიმში იმყოფებოდა. როგორც ელ. მეტრეველმა ათონის მონასტრის ალაპთა წიგნზე დაყრდნობით გაარკვია, იგი იერუსალიმს წასვლამდე 4-5 წლის განმავლობაში იმყოფებოდა ათონის ქართველთა მონასტერში, სადაც 1178 წელს მისულა, ე. ი. თამარის პირველი, მამის სიცოცხლეშივე გამეფების წელს. ისიც ცნობილია, რომ, ქართველ მეფეთა კურთხევის ტრადიციის კვალობაზე, რომელიც ითვალისწინებდა მეფისათვის გვირგვინის დადგმას ქუთათელი ეპისკოპოსის მიერ, თამარს გვირგვინი ანტონ ქუთათელმა დაადგა

(ქართლის ცხოვრება, 1959:26-27). ნახსენები არ არის კათოლიკოსი. ზემოთ მივუთითეთ, პ. და ვ. კარბელაშვილების აზრით, ნიკოლოზი კათოლიკოსად ყოფილა 1149-1160 წლებში, რასაც მართებულად ვერ მივიხნევთ. ამასთან დაკავშირებით გასაზიარებელია კორნელი კეკელიძისა და ივანე ჯავახიშვილის მოსაზრება. დასაზიარებელია, რომ ნიკოლოზ გულაბერისძის თხზულებაში ფაქტები ქრონოლოგიურად არაა მითითებული, საორიენტაციაა მხოლოდ ბურდუხან დედოფალი, რომელიც იხსენიება როგორც ნიკოლოზისათვის ძალზე პატივსაცემი პიროვნება, რაც მოსალოდნელიც იყო. ბურდუხან დედოფალი, გიორგი მესამის მეუღლე, გარდაცვლილი ჩანს 1177 წლის დემნას აჯანყების ჩახშობისა და თამარის მამისავე სიცოცხლეში, 1178 წელს, გამეფების შემდეგ. ზოგი მეცნიერი ბურდუხან დედოფლის გარდაცვალების დროდ დაახლოებით 1179-1181 წლებს ვარაუდობს.

ნიკოლოზი თამარის გამეფების მომხრე რომ იყო, ორი რამ მოწმობს: 1. იგი მაშინვე დაბრუნდა საქართველოში, როგორც კი თამარს დასჭირდა და მთიხმო სასულიერო და სახელმწიფო საქმეებში მონაწილეობის მისაღებად; 2. მის თხზულებაში საგანგებოდაა დასმული დედათა ფუნქციისა და როლის საკითხი საქართველოს ისტორიაში, რასაც ადასტურებს თხზულებისავე დედააზრი, მწერლის მთავარი სათქმელი: მას ყოვლადწმიდა ღვთისმშობლისა და წმ. ნინოს, ვითარცა ყოვლადწმიდა ღვთისმშობლის მონაცვლის, ხატება და შესხმა წარმართავს. ამიტომ თამარის მეფობის მომხრე ნიკოლოზს რაღაც სხვა რამ მიზეზი უნდა ჰქონოდა კათოლიკოსობიდან გადადგომისათვის.

კ. კეკელიძემ ნიკოლოზ გულაბერისძის კათოლიკოსობა 1150-1178 წლებით დაათარიდა, თუმცა, როგორც უკვე აღვნიშნეთ, დათარიღების საფუძველი არ დაუსახელებია (კეკელიძე, 1960:318). ი. ჯავახიშვილი ვრცლად შეეხო პრობლემას, მისი მსჯელობის მიხედვით, „ნიკოლოზის გადადგომა ან 1177 წლის საეკლესიო კრებასთან, ანდა 1178 წ. თამარის თანამოსაყდრედ დასმასთან უნდა იყოს დაკავშირებული. უკანასკნელ შემთხვევაში ნიკოლოზის გადადგომა უნებლიეთი უნდა ყოფილიყო, რომ გავლენიანი მიქაელ დაჯილდოვებული ყოფილიყო. მერმინდელი ამბებითგან ირკვევა, რომ ნიკოლოზი და მიქაელი მეტოქეები და ერთმანეთის

მტრები უნდა ყოფილიყვნენ, და ეს გარემოება გვაფიქრებინებს, რომ ნიკოლოზს მარტო „სიმდაბლის ძლით“, ანუ თავმდაბლობით არ უნდა ჰქონოდა კათალიკოზობა მიქაელისათვის დათმობილი. აკი ისტორიკოსი მიუთითებს მიქაელის მიერ ჭკონდიდელ-მაწვევერელობისა და მწიგნობართუხუცესობის მოვერაგებაზე უფლისაგან ან უამისაგან, რაც მისი მხრიდან ყოველგვარი უკეთური საქციელის ჩადენას, მათ შორის კათალიკოსობის მოვერაგებასაც გვაგარაუდებინებს. ნიკოლოზი ქართლის სამღვდელთა მოწინავე, განათლებული და მეფეთა სოციალური პოლიტიკის დემოკრატიული მიმართულების მომხრეთა ნაწილის წარმომადგენელი ჩანს და განთქმული მწერალი და ფილოსოფოსი იყო, მიქაელი კი პირიქით, დიდგვარიან აზნაურთა იდეოლოგიის მიმდევარი და მძლავრობის მოტრფიალე, თანაც მწერლობა-მეცნიერებაში სრულებით უცნობი პიროვნება ყოფილა. ასეთი ადამიანის გიორგი მესამის მეფობის უკანასკნელ წლებში გაკათალიკოსება ცხად-ჰყოფს, რომ დემნას აჯანყების შემდგომ მომხდარი მარცხი მეფეს ვეღარ გამოუსწორებია“ (ჯავახიშვილი, 1984:111-112).

ამ საკითხის შესახებ ივანე ჯავახიშვილმა „ქართველი ერის ისტორიაშიც“ გამოთქვა მოსაზრება ქალის გამეფების შესაძლებლობასთან დაკავშირებით, რომ საქართველოში სამეფო ტახტზე ქალი არასოდეს მჯდარა, მახლობელი ქვეყნებისთვისაც ამგვარი მოვლენა სრულიად უცხო იყო¹⁵. „ამიტომ ამ საკითხის გადაწყვეტას დიდი სამზადისი სჭირდებოდა. 1178 წელს წინასწარ ნიადაგის შემზადების შემდგომ, გიორგი მესამემ სახელმწიფო დარბაზი მოიწვია და შეეკითხა, შესაძლებელია თუ არა, რომ თამარი მას თავის თანამოსაყდრედ დაესვა. გიორგი მეფეს თანამოსაყდრეობის წესი ამ შემთხვევაში სრულებით შეგნებულად ჰქონდა არჩეული: სანამ ის ცოცხალი იყო, მას ამ საკითხის გადაწყვეტაზე გაუღენის მოხდენა შეეძლო, ხოლო ეს საკითხი რომ პირველად

¹⁵ ამასთან დაკავშირებით უნდა აღინიშნოს, რომ, მართალია, თამარის გამეფებამდე საქართველოში არასოდეს მჯდარა ქალი მეფედ, მაგრამ საქართველოს დასავლეთით მდებარე ბიზანტიის საიმპერატორო ტახტზე რამდენიმეჯერ იჯდა ქალი-იმპერატორი, დედოფალი: ირინე (780-790, 797-802), ზოია I (914-919), ზოია II (1042), თეოდორა (1042, 1055-1056), ევდოკია მაკრემპოლიტესი (1067, 1071) და სხვ.

მხოლოდ მისი სიკვდილის შემდგომ გამხდარიყო გადასაწყვეტი, დიდგვარიან აზნაურებს შეეძლოთ სრულებით დამოუკიდებლად ემოქმედნათ“ (ჯავახიშვილი, 1983:368). ჩანდა, რომ ეს რთული პრობლემა უნდა ყოფილიყო, რადგან, ერთი მხრივ, საჭირო იყო სახელმწიფო დარბაზისაგან თანხმობის მიღება, მეორე მხრივ, რამდენად იყო შესაძლებელი სრულიად ახალგაზრდა ქალისათვის, – მაშინ თამარი 10 წლამდე უნდა ყოფილიყო – სამეფოს ჩაბარება, თანაც ისეთი სახელმწიფოსი, როგორც საქართველო იყო. ივანე ჯავახიშვილი აღნიშნავს: „მეფედ კურთხევის საკითხი მაშინ ორი თვალსაზრისით წყდებოდა: ერთი სახელმწიფო თვალსაზრისი იყო, მეორე საეკლესიო-სარწმუნოებრივი. მეფის კურთხევის წესიც ორგვარი არსებობდა – სახელმწიფო-საეროცა და საეკლესიო (ხაზგასმა ჩემია. ნ. ს.). პირველისათვის დარბაზის დასტური იყო საჭირო, მეორეს, რასაკვირველია, ეკლესიის თანხმობა სჭირდებოდა. რამდენადაც მაშინდელი წესით მეფეს, სამოქალაქო კურთხევის გარდა, მეფედ ცხება და საეკლესიო კურთხევაც სჭირდებოდა, რომ კანონიერ მეფედ ყოფილიყო ცნობილი, იმდენად, ეკლესიის დასტურის გარეშე, ქალის თანამოსაყდრედ დასმაც, რასაკვირველია, არ შეიძლებოდა. ამგვარად, გიორგი მესამეს უნდა უნებლიედ ეკლესიის მესვეურთათვის მიემართა და ცდილიყო, რომ უპირველესად მათგან მიეღო თანხმობა, რადგან ყველაზე მეტი წინააღმდეგობა სწორედ ამ საეკლესიო წრეებიდან იყო მოსალოდნელი“ (ჯავახიშვილი, 1983: 368).

ამ საკითხის გადაწყვეტამდე საჭირო იქნებოდა კერძო მოლაპარაკებები. ამ დროს კათოლიკოსი ჯერ კიდევ ნიკოლოზ გულაბერისძე იყო, რომელსაც საეკლესიო-სასულიერო წრეებში პროგრესულად მოაზროვნენი უჭერდნენ მხარს, მაგრამ ეს საკმარისი არ იქნებოდა; უფრო რთული იქნებოდა რეაქციული ფრთის დაყოფილება. რეაქციულ ფრთას კი მეთაურობდა მიქაელ მირიანის ძე, რომელთანაც მისი გავლენიანობის გამო ექნებოდა მოლაპარაკება. ი. ჯავახიშვილმა აღნიშნა, რომ უცნობია, თუ რა პირობები უნდა ყოფილიყო წამოყენებული რეაქციული ფრთის მეთაურის მიერ, მაგრამ შედეგის მიხედვით შეიძლება იმის თქმა, რომ მეფე გიორგი მესამემ სასულიერო წრისაგან თანხმობა მიიღო. საქართველოს საეკლესიო ცხოვრებაში სწორედ ამ დროს უნდა

მომხდარიყო ცვლილება, კათოლიკოსობიდან უნდა გადამდგარიყო ნიკოლოზ გულაბერისძე, რომელზეც ისტორიკოსი გვაუწყებს, რომ „სიმდაბლისა ძლით იჯმნა კათალიკოსობისაგანო“. მის ნაცვლად კათოლიკოსი გახდა მიქაელ მირიანის ძე. ისევ ივანე ჯავახიშვილს დავიმოწმებ: „საფიქრებელია, ეს ჯილდო (მიქაელ მირიანის ძეს) იმ მომხრეობისა და იმ ღვაწლისათვის უნდა ჰქონდეს მიღებული, რომელიც მას გიორგი მესამის წინაშე მიუძღოდა საეკლესიო კონსერვატიულ წრეებში თამარის თანამოსაყდრეობის საკითხის უმტკივნეულოდ მოგვარებით“ (ჯავახიშვილი, 1983:368).

ივანე ჯავახიშვილის ეს მოსაზრება, შეიძლება ითქვას, კონცეპტუალურია ნიკოლოზ გულაბერისძის კათოლიკოსობიდან გადადგომის მიზეზის გამოსარკვევად, აგრეთვე, მიქაელ მირიანის ძის გაკათოლიკოსების დეტალების აღსადგენად. როგორც ჩანს, მიქაელ მირიანის ძე გიორგი მესამეს მხარში ედგა დემნა ბატონიშვილის აჯანყების ჩახშობასა და შემდგომ განსაკუთრებული სისასტიკით მის დასჯაშიც. ისეთი განათლებული, გონიერი, ავტორიტეტული, ყველასათვის სამაგალითოდ მინეული ნიკოლოზ გულაბერისძისათვის მიუღებელი იქნებოდა უფლისწულ დემნასათვის სასჯელის ის ფორმა, რომელიც მას განუჩინეს: ძელზე გასმა და თვალების დათხრა. ვ. სილოგავამ ნიკოლოზ გულაბერისძის გადადგომაში კათოლიკოსობიდან, ანუ მის „სიმდაბლითა ჯმნაში“, კათოლიკოსის მკვეთრი პოზიცია დაინახა დემნა უფლისწულის სასტიკი დასჯის გამო (სილოგავა, 1990:92-93). უნდა აღინიშნოს, რომ ნიკოლოზ გულაბერისძე წინააღმდეგი არ იყო თამარის გამეფებისა, რასაც ადასტურებს თამარის მეორედ გამეფებისას იერუსალიმიდან პატრიარქოფიდის გამოწვევა და მისი შემდგომი ქმედება – თანადგომა ახალგაზრდა მეფე ქალისადმი, მაგრამ მას ისეთი გავლენა არ ექნებოდა სასულიერო პირთა რეაქციულ წრეში, რაც მიქაელ მირიანის ძეს ჰქონდა, ხოლო ეს წრე რომ არსებობდა, ამას მრავალი ფაქტი ადასტურებს. ამიტომ ნიკოლოზ გულაბერისძეს, შესაძლოა, გასჭირვებოდა უმრავლესობის დათანხმება ქალის გასამეფებლად. თუმცა უკვე სხვა გზაც არ იყო, ბაგრატიონთა საგვარეულოში თამარი იყო ტახტის ერთადერთი მემკვიდრე. თანხმობის მიუცემლობა სახელმწიფოს კრიზისს უქადდა და შეიძლებოდა სერი-

ოზუელი კონფლიქტის საფუძველიც გამხდარიყო, საშინაო საქმეებში არეულობა შეეტანა, ან სულაც დინასტიის ცვლამდეც მისულიყო საქმე, რაც, ივანე ჯავახიშვილის სიტყვით, უსისხლოდ არ ჩაივლიდა.

ამრიგად, ყოველივე ზემოთქმულის საფუძველზე შეიძლება ითქვას, რომ ნიკოლოზ გულაბერისძემ საკუთარი ნებით დატოვა კათოლიკოსობა სახელმწიფოში შექმნილი მძიმე, ურთულესი პოლიტიკური სიტუაციის გამო. მან თავადვე ამჯობინა, გასცლოდა კათოლიკოსობას, სამეფო კარს და საზღვარგარეთის ქართულ მონასტრებში წასულიყო სამღვაწეოდ. ცხადია, ეს ფაქტი ისტორიკოსის მიერ სავსებით კანონზომიერად შეფასდა „სიმდაბლით ჯმნად“, რაც მისი მაღალი ზნეობის მოწმობად მიიჩნია. იგი მხარში ედგა მეფე გიორგი მესამეს დემნას აჯანყების ჩახშობამდე. მაგრამ როდესაც მეფეს დასჭირდა, ნიკოლოზმაც მის სურვილს, უფრო მეტად კი, შექმნილ პოლიტიკურ ვითარებას, ანგარიში გაუწია და გადადგა კათოლიკოსობიდან, რათა უნებლიეთ ხელი არ შეეშალა ქვეყნის პოლიტიკური ცხოვრების მოწესრიგებისა და თამარის გამეფებისათვის. თუმცა, ისიც შეიძლება ვიფიქროთ, რომ ისტორიკოსის სიტყვები „სიმდაბლითა ჯმნა“ რაიმე შეფარულ აზრს არ შეიცავდეს და ნიკოლოზი საკუთარი სულიერი მოთხოვნებიდან თუ მდგომარეობიდან გამომდინარე გადამდგარიყო კათოლიკოსობიდან.

თუ პირუთვნელად შევაფასებთ ნიკოლოზ გულაბერისძის კათოლიკოსობიდან გადადგომას, იგი რეგრესული მოვლენა იყო საქართველოს საეკლესიო და პოლიტიკურ ცხოვრებაში, რადგან მის შემდგომ საკათოლიკოსო ტახტს დაეუფლა რამდენიმე უმთავრესი სახელმწიფო სახელის მიმტაცებელი პიროვნება, რომლის გადასაყენებლად ახლად გამეფებულმა თამარ მეფემ საეკლესიო კრება მოიწვია.

ნიკოლოზ გულაბერისძის 1177-1178 წლებში კათოლიკოსობიდან გადადგომის შემდეგ მისი საქმიანობა დაკავშირებულია ათონის ქართველთა მონასტერთან, სადაც იგი 1178 წელს ჩასულა, ხოლო 1183 წელს იერუსალიმის ჯვარის მონასტერში გადასულა.

გამოყენებული ლიტერატურა:

ანთელავა, 1983 – ი. ანთელავა, საქართველოს ცენტრალური და ადგილობრივი მმართველობა, თბ., 1983.

ანთელავა, 1983 – ი. ანთელავა, XI-XV საუკუნეების საქართველოს სოციალურ-პოლიტიკური ისტორიის საკითხები, თბ., 1980.

ბერძენიშვილი, 1967 – ნ. ბერძენიშვილი, ათონის კრებულის რედაქცია, წიგნში: ნ. ბერძენიშვილი, საქართველოს ისტორიის ნარკვევები, IV, თბ., 1967.

ბერძენიშვილი, 1974 – ნ. ბერძენიშვილი, საქართველოს ისტორიის ნარკვევები, VII, თბ., 1974.

ბერძენიშვილი, 1979 – ნ. ბერძენიშვილი, საქართველოს ისტორიის ნარკვევები, IX, თბ., 1979.

გულაბერისძე, 1908 – ნიკოლოზ გულაბერისძე, საკითხავი სუეცისა ცხოველისა, კუართისა საუფლოდსა და კათოლიკე ეკლესიისად, ვ. კარბელაშვილის გამოც., ტფილისი, 1908.

გულაბერისძე, 2007 – ნიკოლოზ გულაბერისძე, თხზულებანი, გამოსაცემად მოამზადა, გამოკვლევა, ლექსიკონი და საძიებლები დაურთო ნესტან სულავამ, თბ., 2007.

ეკლესიის კალენდარი... 1976 – საქართველოს ეკლესიის კალენდარი, თბ., 1976.

თაყაიშვილი, 1960 – ე. თაყაიშვილი, 1917 წლის არქეოლოგიური ექსპედიცია სამხრეთ საქართველოში, თბ., 1960.

კარბელაშვილი, 2011 – პ. კარბელაშვილი, კათალიკოსნი და მღვდელთმთავარნი, მეორე გამოცემა, გამოსაცემად მოამზადა, შესავალი, კომენტარები და შენიშვნები დაურთო ბონდო არველაძემ, თბ., 2011.

კეკელიძე, 1960 – კ. კეკელიძე, ქართული ლიტერატურის ისტორია, I, თბ., 1960.

ღორთქიფანიძე, 1979 – მ. ღორთქიფანიძე, საქართველო XI ს. ბოლოსა და XII ს. პირველ მეოთხედში. დავით აღამშენებელი. საქართველოს საგარეო და შინაპოლიტიკური ვითარება XII ს. მეორე მეოთხედიდან 80-იანი წლების დასაწყისამდე. წიგნში: საქართველოს ისტორიის ნარკვევები, III, თბ., 1979.

მესხია, 1979 – შ. მესხია, საშინაო პოლიტიკური ვითარება და სამოხელეო წყობა XII საუკუნის საქართველოში, თბ., 1979.

მესხია, 1986 – შ. მესხია, საისტორიო ძიებანი, თბ., 1986.

ნარკვევები, 1979 – საქართველოს ისტორიის ნარკვევები, III, თბ., 1979.

საბინინი, 1882 – მ. საბინინი, საქართველოს სამოთხე, პეტერბურგი, 1882.

სამართლის ძეგლები... 1964 – ქართული სამართლის ძეგლები, II, ისიდორე დოლიძის გამოც., თბ., 1964.

სილოგავა, 1990 – ვ. სილოგავა, ეპიგრაფიკული ეტიუდები და შენიშვნები, „მაცნე“, ისტორიის სერია, 1990, №4.

სილოგავა, 2003 – ვ. სილოგავა, პატრიარქი X ს-ის საქართველოში (პარხლის წარწერა), წიგნში: ნათელი ქრისტესი, საქართველო, თბ., 2003, გვ. 298-303.

სილოგავა, 2010 – ვ. სილოგავა, ანდერძი დავით აღმაშენებლისა შიომღვიმისადმი, თბ., 2010 (მეორე გამოცემა).

სურგულაძე, 2012 – მ. სურგულაძე, მეფე კათალიკოსი, ჭყონდიდელ-მწიგნობართუხუცესი, კრებ.: შრომები, VI, ივანე ჯავახიშვილის სახელობის თბილისის სახელმწიფო უნივერსიტეტი, საქართველოს ისტორიის ინსტიტუტი, თბ., 2012.

სტეფნაძე, 1990 – ჯ. სტეფნაძე, დემეტრე პირველი, თბ., 1990.

ტიპიკონი, 2006 – ღმრთისმსახურების წეს-განგებანი (ტიპიკონი), II, შეადგინა თაისი ტორონჯაძემ, თბ., 2006.

ქართლის ცხოვრება, 1959 – ქართლის ცხოვრება, II, ტექსტი დადგენილია ყველა ძირითადი ხელნაწერის მიხედვით ს. ყაუხჩიშვილის მიერ, თბ., 1959.

ძეგლები, 1963/1964 – ძველი ქართული აგიოგრაფიული ლიტერატურის ძეგლები, I, დასაბეჭდად მოამზადეს ილ. აბულაძემ, ღ. ათანელიშვილმა, ნ. გოგუაძემ, ღ. ქაჯაიამ, ვ. ქურციკიძემ და ვ. ჯღამაიამ, ილია აბულაძის ხელმძღვანელობითა და რედაქციით, თბ., 1963/1964.

ჯავახიშვილი, 1982 – ი. ჯავახიშვილი, ქართული სამართლის ისტორია, წიგნი პირველი, თხზ., VI, 1982.

ჯავახიშვილი, 1984 – ი. ჯავახიშვილი, ქართული სამართლის ისტორია, წიგნი მეორე, თხზ., VII, 1984.

ჯავახიშვილი, 1977 – ი. ჯავახიშვილი, ძველი ქართული საისტორიო მწერლობა, თხზ., VIII, თბ., 1977.

ჯავახიშვილი, 1983 – ი. ჯავახიშვილი, ქართველი ერის ისტორია, II, თბ., 1983.

NIKOLoz GULABERISDZE- THE CATHOLICOS OF GEORGIA

Summary

Very little information is kept in historic sources about Nikoloz Gulaberisdze- Catholicos-Partiarc and ecclesiastic and public man of the II half of the XIIc.

Though the life and activity of Nikoloz Gulaberisdze has been studied in scientific literature many times, the problem requires to have studied again to define the period of his life and activity, and his place in the history of Georgian State and church, to show his mite in the history of Georgian writing.

This work presents only one period of his spiritual activity. It is namely the period from his youth till his resignation from the post of Catholicos. The research shows that it was Nikoloz Gulaberisdze's own decision to leave the post. It happened because of that heavy and difficult political situation in the country. He went to work in Georgian monasteries abroad. Historians evaluated his step as a sign of his high morality. Resignation from the post of Catholicos was a regressive event in eclessiastic and political life of Georgia.